

LIGÁRADAN PÁBLO LUN TÍTO

Labúrïjan Páblo lun Títo

1 ¹Áu Páblo, le abúrïjabarun gárada to, ában esériwiduti lun Búngiu áu, ában gíñe láni Jesucrístu apóstolu. Oúnaja lumútina lúntima níchugun dúgüdaguaü lun jafíñen ja anúadaja láñabaña Búngiu quei lánigu, lun gíñe gayáraabei lan jasúbudiruni inárüni lánina wafíñen, gayára lámuga jabágaridun ában ibágari derégewati lun. ²Ítara lúba gayára lan jeménigidun lun jabágariduba lan súnwandan lúma Búngiu. Búngiu, le mayéejanbei, aríñaga lumúti luágu líchugubei lan ibágari magúmuchaditi le woun lúmagíñe lubáragíñe ladúgüni ubou. ³Guetóti, queísi chülüjali lan dan, subúdigüda láali ugánu lánina asálbaruni woun, ábati loúnajanina Búngiu le Wasálbaragüle, lun napúrichijani ugánu ligía. ⁴Nabúrïjañoun gárada to bun, Títo, le nanúgübei queísi niraü le tímatimaati, lídan ában wafíñerun luágu Crístu. Ayúmajatina lun bibíjin abíniruni lúma darángilaü lúmagíñe Wáguchi Búngiu, lúma lúmagíñe Wabúreme Jesucrístu le Wasálbaragüle.

Luwádigimari Títo luágu ubouju Créta

⁵Lébubei nígirunibu luágu ubouju le gíribei Créta, lun baráanseruni le mégeigilibei lun laráanserún, lúma lun bíchugun fádírigu lídan ságü fulásu queísi naríñaguni bun. ⁶Ában fádiri lúnti labágaridun buídu, úa lámuga ni cáta uáguti lererúa lun. Lúnti ábanrügü tan lúmari, lúnti afíñe jamá lirájüñü luágu Crístu, gagáambadi, lun gíñe buídu lan jóuserun lirájüñü lueí gayára lan líchugúniwa jadúnrun. ⁷Lábugíñeñein laríajaan fádiri luwádigimari Búngiu, ligía lúnti lubeí labágaridun ában ibágari le úaraguati. Lúnti derégeguañu lan lúngua joun ámu, maríbanme lijéniute, moún lumuti gátadi lan, manígi ligíame wuríbu, mínsiñelá seínsu lun sarágu. ⁸Lubáragíñe líra, lúnti aráanseñu lan súnwandan lun lerésibirun bisídatiña lúbiñe, lúnti ában lan wügüri le jínsiñejabuti lun le buídubei, lun buídu lan lichúgü, buídume loúseruniña sun gürígia, derégeguañu lúngua lun Búngiu, láu ubáfu lun lárügüdagun lúngua. ⁹Lúnti lárügüdüñ luágu ugánu inárüni le uágubei gayára lan weménigidun,

le arúfudajóubei lun, lun gayára lan líchugun dúgüdaguai joun ámu láu arúfudajani le richábei, lun gíñe laññeragüdüniña ja asígenerubalin.

¹⁰Lugúndun añájein sarágu magáambaditiña, jádaantima jarásan juríu, ja arúfudajabaña libídiouniga áu, ayéeda jamáña gürígia. ¹¹Lúnti ladaurúniwa jayúma ja, ladúga chagáguagüdatiña sarágu família láu jarúfudajani le moún lubei, lun jagáñeirun seínsu láu múarani.

¹²Aríñagatí meja ában chu táu Crétana, le ñí bubei guetó, jawágu lupaísanun. “Gürígia Crétana, súnwandan yé jama, machúlaaguntiña, jalíluatiña, magúali.” ¹³Áni inárÜni laríñagubei. Ligía lubeíti, badeínja joun jére, lun jóúdin láu arúfudajani le richábei luágu wafíñen, ¹⁴lun gíñe mebéresen jamá láu buri úraga le jadáagun juríu, ni láu le jaríñagubei gürígia, játima íchugubalin janágan luágun inárüni.

¹⁵Queísi laríñawagúniwa, jarúmati sun cátei joun ja jarúmabaña anígi, ánjein joun gürígia ja íchugubalin janágan luágun inárüni áni marúma tugúya janígi, madárirun jamúti ni cáta jarúma, wíyeti jasáminan, wíyetu gíñe janígi. ¹⁶Aríñagatiña luágu subúdi lan Búngiu joun, láu buri cátei le jadúgübei, arúfuda jamúti luágu ibídiñe lan Búngiu joun, lugúndun mínsiñejabutiña, magáambaditiña, mayáraatiña lun jadúgüni le buídubei.

Arúfudajani inárüniti rúti ibágari buíti

2 ¹Ánjeinti amúrü, Títo, lúnti barúfudajani luwúyeri igáburi le lúnbei jagáburiduni affñetiña luágu Crístu, ában ibágari le úraguabei lúma inárüni le lúmagiñebei Búngiu. ²Lúnti mátun jamá wügúriña weíyaaña mútu, inébewa jagíame, buídu jachúgü, derégüdagü lídan jaffñen luágu Crístu, buin láu ínsiñejabuni lúma gurásu. ³Würíña gíñe ja weíyaaña, lúnti gíñe buídu lan jóuserun queísi lánigu Búngiu, lúnti mamárasualugu jamá, mabácharuadun jagíame. Lúnti jíchugun jémpulu buíti láu jabágaridun lúma jerérun, ⁴lun jarúfudajan joun würiña ñúbürigiña jaweí lun jínsiñe jamá jámari joun, jínsiñe jarájüñü joun, ⁵lun buídu lan jachúgÜ, jarúma jagía, aráanseja jagía jábiñe, areída jagía, gagáambadi jagíame lun jámari. Lúnti ítara lan jabágarí würiña, lun úa jamá ni ában adímurejatiña wuríba luágu ugánu le láni Búngiu luágu asálbaruni láu affñeruni luágu Jesucrístu. ⁶Arúfudajabá joun wügúriña irájüñü lun buídu lan jachúgü, ⁷rúba ában jémpulu buíti joun lídan sun cátei. Arúfudajabeí lérügü inárünibeí joun láu ában igáburi derégüdati, ⁸adímurejeina láu ában igáburi magádieta le uáguti lásiñera ladárirún mégeiti. Ítara lúba janúgüba báganiñu busíganu luágu luríban jóuserun áni siñábei jadímurejan wuríba buágu.

⁹Aríñagabá joun esériwidutiña lun gagáambadi jamá joun jayúbudirigu lídan sun cátei, moúnabagun jamáñame, lun buídu lan jesériwidun joun, ¹⁰lun míwerujan jamá, lun jarúma lan jagáburi le gumúti jáma jayúbudirigu lun larijiniwa lídan ligáburi jabágaridun luágu buídu lan arúfudajani le luáguti Búngiu Wasálbaragüle.

¹¹Arúfudajabei cátei le, Títo, lugúndun arúfuda láali Búngiu lareídun woun, le ídaangiñebei gayára lan jasálbarun sun gürígia lídaangiñe luríban jagáburi. ¹²Arúfudaja láali Búngiu woun láu lareídun lun wígiruni wuríbani lúma ayúmajani lánina uboú, lun wabágaridun ában ibágari le buíti ligíbuagu uboú le, ragúguañu woúngua, derégeguañu woúngua lun Búngiu. ¹³Niján luwúyeri igáburi le lúnbei wagáburidun lídan le wagúrabajaña lan lagúnfulirun lubuídun cátei le uágubei laríñaga Búngiu—lagíribudun Wabúngiute, Wasálbaragüle Jesucrístu uboúagun láu sun luweírigun. ¹⁴Derégeguati lúngua lun loúnwen wawágu, lun lasálbaruniwa lídaangiñe sun wuríbani lúma lun larúmadagüdúniwa le gumúti, lun láni wamá, aráanseñu lun wadúgüni le buídubei.

¹⁵Ligía buri cátei le lúnbei barúfudajani, íchigeina dúgüdaguaü, arérejeina láu sun ubáfu. Míchigabá lúgaaru lun banúgüniwa quei ni cáta.

Cátei lé buri lúnbei jadúgüni afñetiña

3 ¹Jarítaguagüda báña afñetiña luágu Crístu, luágu lúnti lan jagúnfulirun jáma gumádimatiña lúma jáma ja oúnajabaliña, lun gagáambadi jamá joun, aráanseñu jagíame lun jadúgün furúmieguaugü cátei buíti, ²lun madímurejan jamá wuríba luágu ni ában, lun dílf lan jóuserun, areída jagíame, lun únabugu jamá lídan jóuserúniwa sun gürígia.

³Lugúndun wagía afñetiña, ibídiouguati meja gíñe wáu, magáambadi wagía meja lun Búngiu, barútiwa meja ában úma wuríbati, lidámun meja sun luwúyeri ayúmajani wuríbati lúma ugúndani wagía. Jéchutiwa meja adúga wuríbani joun ámu, wabágariduña meja lídan gimúgaü, iyéreejabutiwa meja, iyéreegutiña meja wíbirigu woun. ⁴Ánjeinti dan le larúfudunbalin Búngiu Wasálbaragüle lareíni lúma línsiñejabu joun gürígia, ⁵ába lasálbaruníwa, máma jamúga ladúga wadúgün som cátei buíti, ladúga wagúdeme lun. Sálba lumútiwa láu lachíbuni wafígoun, rúti Sífiri Sándu iséri ibágari woun lun gayáraabei lan wabágaridun queísi labúseerun. ⁶Lugúndun rúlaali Búngiu Sífiri Sándu woun lídaangiñe Wasálbaragüle Jesucrístu, lun wámabei lan láu sun luweírin lubáfu. ⁷Láu larícharaguagüdúniwa Búngiu ligíbugiñe láu lareíni, gayáraabei werésibiruni ibágari magúmuchaditi le wagúrabajabei lúmagiñe Búngiu siélu. ⁸Inárüni cátei le.

Buséntina lun barúfudajani buri cátei le láu ában éregu, lun ja lan afñebaña luágu Búngiu, lun súnwandan lan jíchaagun jóungua lun jadúgüni cátei le buídubei. Buíti cátei le, áni buíti lanúgün joun sun gürígia. ⁹Díseba lueí sigénei buri le málati, úraga buri jawáguti binádu mútu, fáreinguaü buri, lúma buri wuríbu lueígiñe lilúrudun Moisés. Sún buri cátei líra, manúgünti buíti lun ni ában.

¹⁰Ánjein ñí lubei ában tílana ligílisi le adúgübalin fáreinguaü, erérabá lun ában o bián weíyaasu, ánjein madúgün gásu báu, ígirabeí lúngua.

¹¹Subúdi báali luágu ígira láali lan wügúri ligía úma le surúbei láu luwúyeri labágaridun.

¹²Dánme nouñajani Artémas o Tíquico lan lun lárügüdüni bubára ñi, buséntina biábin aríjana Nicópolis lugúndun ñíba násügürei lidáani luríbouga. ¹³Íderaguabeí Zénas, le subúdíjabúbei lun lúrodu, lúma Apólos lídan sun le buáraati, rubeíme le jemégeirubei joun lun jasígiruni jaweíyasun. ¹⁴Furéndeí jamá gíñe sun wánigu lun jadügüni cátei le buídubei, ídeja jagíame dan le mégeiwa lan, ju lámuga jabágari lídan Crístu.

Mábugaü

¹⁵Mábuga jáña sun ja númabaña bun, mábuga wáña joun ja jínsiñejabúbaña woun queísi idújeñu lueígiñe Crístu. Binílaün Búngiu sun jugúya ja alíjibarun gárada to. Ítaralá.